

# Igoro ya 'Ng'anaki...

Barry, A. L. - WHAT ABOUT? DEATH AND DYING - Ekegusii

## Amakweeri na Ogokwa

Omonyagitaari A. L. Barry  
Omotaang'ani  
Ekanisa y'Ekeluteeri y'Esinooti ya Missouri



## Igoro ya 'Ng'anaki...Amakweeri na Ogokwa?

Amakwaania ase erieeta ria Yeso Kristo Omonene oito. Buna Abakristo, 'ntore n'oborori bwa beene igoro y'amakweeri, oborori obwo bore oboao kegima korwa ase orogoongo rotoetanaine. Ekereenga ki'amariiko aya nokogokoonya, gose komokoonya omoonto gete omanyete, anyoore na komanya 'ng'a amakweeri niinki, na buna koreng'aana Abakristo bakweariganeria amakweeri na gwechaandera obororo.

### Amakweeri Ninki?

Ebibilia nigo egotwoorokereria 'ng'a amakweeri tari ogosirigwa ase okwo okobao gwaito kogoikera omoerio. Amariiko Amachenu nigo agotwoorokereria 'ng'a amakweeri n'okoruusanania gose ogwaatanana omoika oito o kare na kare korwa ase emebere yaito eyio egokwa. Emebere yaito nigo egotimoka ime y'echimbeera, eganyererete riituko ri'omoerio ekeri omoika n'omobere birabwaatanigwe. Engaki y'ogokwa, emeika yaito, amo n'emeika ya baria batiékire gokwa ase okwegeena, nigo ekoba bosio bwa Kristo erio kegima, na negookere okobao Kwaaye [Kristo], omoreembe n'omogooko goika engaki y'eriituko riria rinene ri'okobookigwa kw'emebere yonsi.

### Inee, Amakweeri Negeento Kereo?

Nigo ere engeencho enarire koreengereria igoro y'amakweeri buna egeento "kereo." Noonya n'abaanto baande baigweekire bagoteeba, "Amakweeri nomosaani." Riinde tiriyo ri'ekeene goetania erio! Amakweeri noboene bw'okwooboyia. Nomobisa okomonyoora kera oyoomo oito ekeri ki'omoerio bw'obogima bwaaye. Amakweeri nokoragererigwa gw'okwooboyia okwo kwaboocherete obotoongi ase enchera y'ebibe bi'Adamu na Hawa aaria ase Omogoondo o Eteni. Ase enchera y'ebibe ebio, amakweeri agaacha ase ense naigo akabanyoora mwanayabaanto boonsi ekiagera boonsi nigo bagokora ebibe.

Nyasae tabatoongete mwanayabaanto bakwe, koreende [nigo abatoongete] babe mooyo babe mooyo kare na kare na komogookera Ere kare na kare. Amakweeri tareenge enseemo y'ogotoongwa gwaito korwa omochaakano koreende negeento kiareentetwe

n'ebibe bi'ogotaigweera bi'abaibori baito beriitaang'ani – ekebe ki'ogotaigweera ekio kiaereraniigwe goocha ase kera mwanayabanto korwa engaki eyio.

### Ninki Gekogera Ebabeterereti Abakristo Gokwa?

Amariiko Amachenu nigo akwoorokia maiso marore 'ng'a nebabeterereti Abakristo boigo goetera amakweeri eriinde banyoore obogima. Nigo tokweorokereria 'ng'a emebere yaito nigo ekweete kegima boono ase engeencho y'ebibe ("Om[o]bere [nigo] [o]kwe[e]te ase enge[e]ncho y'ebibe" (Rum. 8:10). Naseigo, nebabeterereti Abakristo gokwa.

Obororo bw'amakweeri n'obomanyi bw'okogaambia kwa Nyasae, nebisusuro bi'okwooboyia ase baria batamwegeeneti Kristo buna Omotooria obo. Omoerio bw'obogima bwaabo, banyoora ogoseemeria gwooka kw'engaki egoocha etamanyiri, gose oborori bw'okwooboyia bw'okoragereria gwa kare na kare. Noonya ere boigo, ase obomanyi oboikeranu, amakweeri y'Omokristo tari amakweeri agwekaine aria y'omoonto otari Omokristo. Ekiagera ase Omokristo, obogima bwa kare na kare amo n'omogooko nigo bigoocha nyuma y'amakweeri. Ekiagera Yeso Kristo Omonene oito Neere ogotaara amo nabarabwo ase "Omwe[e]nya bw'ek[e]iriri ki'amakwe[e]ri" (Zaburi 23).

### Inee, Okoiraneria kw'Omokristo 'Nkoroki igoro y'Amakweeri n'Ogokwa ?

"Ninsa goeta ase omwe[e]nya bw'ek[e]iriri ki'amakwe[e]ri, tinkoiroka bobo bo[o]nde." Amang'ana aya amanyekanete korwa ase Zaburi 23, nigo akwoorokia enchera y'Omokristo omonyene gose eamate yanyoorirwe n'oboene bw'amakweeri. Aiga, chingaki buna echio, Nyasae nigo akomoorokia omobisa oito omonene obwooba. Ekiagera onde oito ataiyo ase egati y'abare mooyo oyarorire amakweeri, okoiraneria kw'ogoseemeria gwaito igoro y'amakweeri (abe ayaito intwe abanyene gose ay'omoonto gete twaanchete) nokw'obwooba. Obwooba negeento kereo.

Boono, onye obwooba bore omobisa, ning'o ore enseemo yaito? Omoriiki o Zabur

## Igoro ya 'Ng'anaki...Amakweeri na Ogokwa?

nigo ageenderete goteeba, "Ekiagera [A]ye Omonene nigo ore amo nainche, enyi[i]mbo Yao n'enu[u]ngu Yao 'nabindemie." Yeso, Omoriisia oito Omuya, Ere oyio oborweete obogima Bwaaye ase engeencho y'echingoondi, Neere omosaani oito, [ore] ase enchera y'omoerio ere n'omosuunte, eyio egoetera ase omweenya bw'ek[e]iriri ki'amakweeri. Orogeendo oro tirori rw'ogochora. Rituko erimo, kera oyoomo oito, abe omogotu gose omosaae, nayeetere enchera eyio. Aya nigo arageenderere goika riituko riria Yeso arairane naende ekeru, egetuureri ki'omoerio keraabuge, abegeenwa 'mbaonchorwe okomiamia n'okoramokia (1 Kor. 15:51-52).

Koreende, aiga 'ntore enseemo ere n'engeencho kegima: Niing'ete ase omweenya. Ere oyio ore amo naintwe ase orogeendo orwo, oyio ogotoraa, naare nechingoma chi'amakweeri as'omobere Oye ore n'obogima. Ere konya okuure, koreende boono 'mooyo are kare na kare. Boonsi abwo beegenire na kobatiiswa 'mbatooreke; 'mbare n'enseemo y'obobui Bwaaye igoro y'amakweeri. Aseigo, Abakristo, 'mbanyaare korora amakweeri tari buna oboene bw'ogoichania bogweenerete koremererigwa, koreende buna omobisa obuetwe. Okobookigwa kw'omobere n'obogima bwa kare na kare nabio bire ebi'ekeene naende ebi'okwegeeneka ebio boonsi barieretwe eira abwo bagotigara koba abegeenwa goika ogokwa.

### Ninki Gekoba nyuma Gotwaakuure?

Ase abatari abegeeni, ogokwa "gwa kabere" 'nkoreo (Okom. 20:14) agwo ase emeika yaabo eraabe bosio bw'omobe Saitani na erio kegima bachaake gochaandeka ase okoegwa egesusuro gia kare na kare aaria ase obosiru, korwa agwo, ase batanyaare gotama. Riituko ri' ekiina emebere yaabo nebwaatane n'emeika yaabo aaria ase abakuure.

Baria baseemeretie ogotooreka okwo Kristo Omonene oito atobuerete nigo bagoetera ase amakweeri basoa ase obogima. Eke nakio gekogera Ebibilia egokorera emeremo emegweekano emeenge y'okoremia eriinde kweera amakweeri y'omwaana o Nyasae.

Ebiiga nabio ebimo biabo bi'echincherere echio Omoika Omochenu agokorera emeremo kweera amakweeri y'Omokristo: ogosangererekana ase obosio Bwaaye; okogeenda ase omoreembe; okogeenda na okoba amo na Kristo; ogweatanana korwa ase amabe agochigoocha; okoraara; ogotimoka; ogoeta korwa ase amakweeri na goika ase obogima; okoruusia korwa ase amabe oonsi; na omoerio, "okogweenera."

Okogweenera? Inaki amakweeri aranyaare koba okogweenera? Ekeru omwaana o Nyasae obatiisire agoetera ase amakweeri – omwana o Nyasae oyio oboorigwe n'amanyiinga y'Engoondi ya Nyasae – rirorio amakweeri nokogweenera. Ase enchera y'amakweeri, abaana ba Nyasae nigo bagosoa ase omogooko n'omoreembe o kare na kare [koba] amo na Ise obo ore igoro.

Aseigo, kera Omokristo nanyaare kogookera obogima obwo Kristo amobueire n'obwo akomoa ase Riing'ana n'Echisakaramenti. Ekeru togokwa, emeika yaito nigo ekoganya ogosirigwa kare na kare kw'ebiinto bioonsi riituko riria Kristo arairane. Nigo toranyoore emebere y'obonene eyio etari n'amariga, n'obororo, n'amarwaire, n'obogotu – emebere y'okobookigwa emeyia naende y'obonene.

Ime y'emebere eye emeyia naende y'obonene, 'ntomenye aaria igoro kare na kare, twegookie bosio bwa Nyasae amo n'abachenu Baaye boonsi, moerio otaiyo. Omogooko omoonge bw'ekee eke, nigo oetanetie noonya n'ogochaaka komanya gwaito, koreende eke nekeene!

### Inaki Abakristo Bakweariganeria Amakweeri?

Abakristo nigo bakweariganeria amakweeri buna koreng'aana bakweariganeria obogima amaiso aabo amorigereretie Yeso bokong'u. Nigo tokobwaaterera chiira chie Riing'ana Riaye, echio, ekeru tore aang'e gokwa, chikorerekana koba echi'ogokumia naende echi'okobua goetaania. Eira eyeemo engiya kegima kobua chionsi eyio Omonene oito atoete nigo egotooka ase Yohana 14:23 agwo ase agoteeba, "Ase enyo[o]mba ya Ta[a]ta ne[e]re n'obome[e]nyo obo[o]nge; onye taibo,

## Igoro ya 'Ng'anaki...Amakweeri na Ogokwa?

anga [']nabate[e]bia. [']Nkoge[e]nda [']nde kobaroseria aase. Kondage[e]nde kobaroseria aase, ninchiche naende, nimbaroisie ase[e]nde, eri[i]nde ase[e]nde Inche, nainwe mobeo."

'Ntomanyete 'ng'a 'nchera ende yonsi obogima bwaito boraikere omoerio, egeento ekemo 'nkereo ekio toranyaare koba n'ekeene nakio kegima. 'Ntoete korwa ase amakweeri na tosoe ase obogima, naende 'ntoete korwa ase obogima obo na tosoe ase obogima boria bogochigoocha, amo n'Omonene oito. Naagwo 'ntoumerane naende n'abaanchwa baito boonsi n'abaande abwo baraabe batotaang'aneire bamoseemeretie Kristo Omotooria obo.

### Inaki Omokristo Agweechaandera Obororo?

Abakristo tibagweenereti gwetaanga korera. Omonene oito akarera ase embeera y'omosaani oye Lazaro. Naitwe boigo 'nkwenyoora tore tokorera ase engeencho y'obororo bw'okorara kw'omwaanchwa. Koreende titori koba n'obororo buna baria batari n'ogoseemeria (hope). 'Naki onye twegeenire 'ng'a Yeso nakwete, naende akabo[o]ka, naboigo n'abwo bara[a]rire ase Yeso, Nyasae nabare[e]nte amo [N]e[e]re (1 Tes. 4:14). 'Ntoganyete okoumerana okonene naende n'abaanchwa baito abwo batiakire koraara ase okwegeena. 'Mbatoborete. Ogwaatanana gose okorusanania oko nabo koranyaare kororekana gotoritoerete kegima chingaki chiinde. Obororo obo nigo bore enseemo y'ebirero; 'mbogweenerete bomanywe tari gotaitabwa.

Ase abaanto abaange, ebirero n'orogeendo. Norogeendo korwa ase obororo bwe ritaang'ani bw'okoraara kw'omwaanchwa, gochia ase okogweena n'okobwaatanigwa kw'ogosirerwa. Obororo obwo nigo bokoera 'ng'orang'ora, koreende ribaga ri'oria oraarire nigo rigotigara kobao. Obororo nigo bore n'echinseemo chinyiinge naende nabo boranyaare kororekana bore obotakageiri ase ogokeana n'okomeenteka kwaye; koreende ase Kristo, nigo tokonyoora chiinguru ekeru tore ase orogeendo. 'Naki titori 'ntwe tweeka ase orogeendo oro.

Abakristo nigo bakomanya 'ng'a eamate amo n'abasaani n'ebieegwa korwa ase Nyasae abwo bakobakoonya koremereria okoraara kw'omwaanchwa, okwo chingaki chiinde gokororekana goetanetie oboremereria bwaabo. Ogoikwa aang'e buna okwo nokwengeencho ase ogwechaandera obororo ase enchera egwenerete. Nebabetereretie abwo baakorera barigie ogoikwa aang'e okwo ase okweemanyekania. Nigo ekobabeera aorooro abaanto abaange abwo bakorera korwa omogano bw'omwaanchwa oraarire gochia ase eamate n'abasaani abwo baseemeretie. Okoyoiranerera omogano oyio nigo gokoreenta obotoereru (release) n'obomanyi ase omogooko igoro y'emechaando y'oria oraarire. Abasaani neamate 'mbaganie gotegerera na goichanera ogoteebigwa n'okoiranerera buna okwo. Nigo rire ribaga ria beene koegwa oboteneenku buna obwo. "Bogorerania chigurube inwe ase inwe, nario moraikeranie amachi[i]ko a Kristo" (Gal. 6:2).

Goetaania oonsi, Abakristo bare ase ebirero 'mbatamere ogosasiima kw'obomo gw'ekanisa n'oboonge bw'okoremia kwe Riing'ana richenu n'Esakamenti ya Nyasae ase okogweenia ase orogeendo rw'obororo. Ekiagera Yeso Kristo nigo amenyete ime y'Ekanisa Yaaye ase enchera y'ebibeekerero bi'obuya Biaye ebichenu. Ase enchera y'ebio, nigo akorwa oboonge Bwaaye bw'okwaabera [ebibe], obogima amo na ogotooreka boono, na kare na kare. Riituko erimo naintwe boigo, 'ntotenene amo n'omogaanda omonene o igoro oyio okoigwa amang'ana aya y'ogosesenigwa:

"Rora obomenyo bwa Nyasae nigo bore amo nabarabwo, na barabwo [']nababe abanto [B]a[a]ye, na Nyasae omonyene nabe amo nabarabwo. Ere nati[i]nyie kera ririga korwa ase amaiso abo; amakweeri takobao no[o]nya [']ng'ake, no[o]nya nokweumia, gose okorera, gose obororo tibikobao, ekiagera amang'ana e rita[a]ng'ani aikire goeta" (Okom. 21:3-4).

Omonyagitaari A. L. Barry

Omotaang'ani

Ekanisa y'Ekeluteeri y'Esinooti ya Missouri